

---

صباح الخير علي عيونك

أشعار وأغاني بالعامية المصرية

تأليف شاكِر صبري



---

# اهداء

## إلى امي



---

رغم كل اللي يقابلني  
رغم كل اللي يقابلني  
باعشقك وياحن ليك  
رغم كل الصعب بينا  
مهما يحصل مهما يجري  
انت ليك في القلب ذكري  
انت ماض وانت بكرة  
بعد ايه دا انا دبت فيك  
مهما يحصل عمري ما اهرب  
من عنيك ف البعد اقرب  
قلبي عمره ما يطاوعني  
عمري ما اهب من عنيك  
رغم طول البعد بينا  
الغرام دايمنا واصلنا  
تبقى اغلي لحظة عندي  
لما اطمئن عليك



---

لوتفرقنا الليالي  
جوا قلبي انت يا غالي  
جوا روحي وف خيالي  
قلبي دايم بيناديك  
باعشقك وباحن ليك  
بعت عمري واشترك  
عمري ما اهرب من عنيك

=====

يا سعادة الباشا يا سعادة البيه المامور  
يا سعادة الباشا يا سعادة البيه المامور  
انا عايز حقي من الدولة وادخل ف الدور  
انا عايز احس ان انا مصري واعيش مستور  
انا عايزك تعاملني برحمة  
بالنظرة وبالكلمة الحلوة  
مش هاطلب منك يوم لقمة ولا عمري هاتور  
وساعتها يا باشا هتلقاني طيب وصبور



---

وهايوس الايد بعد تحية ولا ابدا اجور  
ولا هاضلم جاري ولا هاسرق ولا اكون طرطور  
ولا هاشرب بانجو ولا هاسرق ولا اكون مخمور  
انا نفسي احس اني مواطن واكون انسان  
لو اتعب القي اللي يداوي واشعر بامان  
واولادي يعيشوا ف سعادة راح اكون سلطان  
مش عايز اكثر من حقي يا سعادة البيه  
وساعتها العيب لو يتبعني اجلدني عليه  
وساعتها الي يبص لمالك اقلع له عنيه  
دا الكل بينهب ف بلادي وانا مالي نصيب  
والكل بياكل ويقربع وانا فيها غريب  
وكمان مش عاجب ولا واحد ولا ليا حبيب  
والحافي لما بقي مالك مدد رجليه  
وكلب جيراني بيعضني لويوم الاقيه  
حوالي الدنيا بقت سودا طب اعمل ايه  
انا عايز احس اني مواطن يا سعادة البيه



---

ما عادشي يفيد ولا ينفع  
ما عادشي يفيد ولا ينفع  
باني ف يوم اليك ارجع  
رجوعي اكيد دا امر بعيد  
ما عادشي يفيد  
باني اميل اليك واسمع  
بلاش احلام  
كفاية كلام حبيبي سلام  
دا جرحك فيا لسه بيسمع  
دا يا ما القلب غني لك  
ويا ما صبرت علي حالك  
ما جتش ف مرة علي بالك  
وكان ناقص اليك اركع  
حبيبي خلاص ميعادك فات  
كفاية سراب بلاش حكايات



---

مليت الكاس من الاوهام  
كفاية خداع كفاية غرام  
دا نا يا ما اليك في يوم حنيت  
وقفت علي البيبان وبكيت  
ويا ما لقسوتك عدت  
ما عادشي ما بينا خيط يجمع

=====

علي عيني وعلي راسي  
علي عيني وعلي راسي  
حبك تاجي وكاسي  
حبك اهلي وناسي  
حبك ملي احساسي  
علي عيني وعلي راسي  
حبك كل حياتي  
حكاياتي ورواياتي  
الحاضر والاتي



---

بس بترجع ناسي

حبك بلسم قلبي

ناري ونوري وحي

يا هدية من ربي

دقاتي وأنفاسي


لما تغيب عن عيني

الافكار تطويني

والحيرة تكويني

ويزيد بيا حنيني

واقعد وحدي اسي



تسع تيام بليالهم

تسع تيام بليالهم تسع تيام

وانا واقف علي باب الحبيب

دايب وقلبي م الغرام شايب



---

وانا سهران

وسقت عليه نجوم الليل

غزلت م الغرام مواويل

وقلت لعله قلبه يميل

وعشت معاه ف حلم جميل

وانا عايش حياتي غرام

وهو ينام

وانا حيران

تسع تيام حبيبي عمره ما درابي

وعمره ما حس بعذابي

وسابني وحيد علي بابي

وليلى ظلام

يشوفني يبتسم ليا

كأنه ما شافش ايه بيا

ويقرا الحب ف عنيا

ولما يشوفني متحير



---

يعيش ف غيام

حبيبي ليه بتلعي

تعال وشوف ضنا قلبي

وليه للحب بتخي

دا كله حرام

.....

انا الاديب الادباتي

اكل واطلع شنباتي

شلبية دي تبقي مراتي

عملت لي م الفتة صينية

وبيتنا كان جنب المية

طلعوا علينا الحرامية

وكنا وقت الظهيرة

وشافتهم البت سنية

هربوا وركبوا معدية

.....



---

تصبح علي خير

تصبح علي خير يا حبيب قلبي

تصبح علي خير

وتبات متني وعيونك بالحب تطير

راح احطك ف عيوني واسهر

وتنام وف حي تبات تسكر

وابات الليل وياك افكر

واضلل برموشي وقلبي من خوفي عليك

تصبح علي حب علي سعادة

تصبح علي حب علي سعادة علي بسمة وفرح فوق العادة

وتنام تحلم بي وانا صاحي سارح ف عنيك

راح تصحي من النوم تلاقيني ف شعاع الشمس

ولودروت في الدنيا بوجودي تحس

دا انا حبك سكره بزيادة ف الروح بيمس

دا عايش

=====



---

بحبك يا اللي مالكاني  
يا ساكنة ف روجي وكياني  
يا اجمل حاجة عاجباني  
لقيت نفسي معاك تاني  
يا اجمل حاجة فيا  
دا حبك حاجة تانية  
ومعاك ملكت الدنيا  
ودايما إنت واحشاني  
بحبك ليه محيرني  
وطيفك كان بصبرني  
ورمشك عنيك بيسحرني  
ولما القرب يجمعنا  
انام واصحي علي الفرحة  
والاقي الدنيا سايعاني  
وزهر القلب فتح لك  
بنبض الروح بيسمح لك



---

باحبك عمري مرتاح لك

لأنك جوه وجداني

بحبك يا اللي مالكاني

معاك الحب شيء ثاني

\*\*\*\*\*

وبحبيها

وبحبيها والكل عارف انها

اول حقيقة عرفتھا

اول حكاية عشتها

اول حبيبة ابوح لها

هي الاماني كلها

وتدوروا عنها تلاقوها

جوا روعي ومهجتي

هي طريقي وسكتي

هي حياتي ودنيتي

اجمل حكاية عشتها

ولا بعدها ولا قبلها

وبحبيها من جوا ذاتي



---

دا حېها نور حياتي  
وظلها نور ذكرياتي  
وهي اجمل امنياتي  
ولا عمري انسي عهدها  
هيا نعيمي وهيا عمري  
هيا خيالي وهيا فكري  
ولحېها سلامت امري  
ولا تلقوا عندي قدها  
احلف لها احلف لها  
من جوا قلبي بحېها  
روحوا يا ناس قولوا لها  
قولوا لها  
اني اتعرفت بحېها  
ولا بعدها ولا قبلها

\*\*\*\*\*

ما دام الحب جمعني انا وياه  
وبت ليالي أتمني حياتي معاه  
وشفت الحب ونعيمه وذقت هواه



---

انا سلمت له قلبي ومش هانساه  
دا قبله كان حياتي عذاب  
فتح قلبه لقلبي الباب  
دا حب حقيقي مش كذاب  
لقيت كل البشر احباب  
وكلمة منه راح تبقي لقلبي دواه  
انا حبيته من قلبي ومخلص ليه  
ومهما يكون اكون ضله واداري عليه  
كفاية اني اشوف صورته واطل عليه  
كفاية نظرة تسعدني برمش عنيه  
كفاية اني لما افتح عيوني القاه  
ما دام الحب خلاني ف روحه ادوب  
انا مش هانسي ايامه وعمري ما اتوب  
وها رضي بالهوي والعشق والمحبوب  
وهاخلص ليه مدي عمري وادوب فيه دوب  
وهافضل عمري مستني ساعات لرضاه

\*\*\*\*\*



---

مفیش ولا لحظة ولا ثانية

مفیش ولا لحظة ولا ثانية

مفیش ولا حاجة في الدنيا

تساوي لمسة لاديا

تساوي فرحتك بيا

تساوي الفرحة ف عنيا

وانا وياك

باحس بنفسي ف وجودك

وقلبي يغني علي عودك

ولما يحس بقدمك

بيعمل عيد

بيبقى سعيد

يحس بانه متني

يعيش الحب ويغني

يدوب ف هواك

يعيش وياك

ويستناك

مفیش ولا حاجة تجرحني



---

ما دام حبك بيفرحني  
باطير وامسك نجوم الليل  
وقلبي يغني ليك مواويل  
ويرقص م الفرح ويميل  
يطيروياك  
ويستناك  
ليوم لقياك  
ف كل مكان بنتقابل  
باعدود تاني واكون فاكر  
لذكري الحب والاحلام  
واعيش واحلم معاك واصحي  
مع الذكري مع الفرحة  
مع شوقي الي لقياك  
\*  
ومهما العمر يسعدني  
ومهما الدنيا توعدني  
ومهما سني تبعدني  
انا عمري ما اخون عميدك



---

ولا قلبي يعيش بعدك

ولا ينساك

\*\*\*\*\*

بحبك وانت علي بالي

ف قلبي وروحي وخيالي

عيونك غيرت حالي

وحبك تاجي يا غالي

بنظرة رمش وف ثانية

دخلت ف دنيا مش دنيا

لقيت الحب شيء ثاني

يخلي للحياة معني

يخلي الصعب حاجة ثانية

ف لحظة شوق يتجمعنا

همومنا تروح تودعنا

ونجم الليل بيسمعنا

وليلنا يطول

وحبي ليك فوق الوصف

ومش عادي دا احب بعنف



---

وحبي ليك قوة وضعف

وعهدي عمره ليك علطول

وحبي حب مش عادي

وحبك غايتي ومرادي

ومش هيزول

وحبي حب فوق الحد

وعمر ما حد حبه لحد

بيطرح بين اديك الورد

باحبك يا نعيم عمري

يا مالك مهجتي وامري

يا مالك بالحنان فكري

\*

باحبك وانت حباني

عجبتك وانت عجباني

وصورتك مالية وجداني

وصوتك كل الحاني

معاك الدنيا شيء ثاني

باحس بروحي وكياني



---

## وبيك مشغول

\*\*\*\*\*

لفين هتروحي يا بلادنا  
ما عاد ولا شيء بيسعدنا  
طباع الانس بقت تفقع  
ما تلقي لا راحة ولا هدنة  
وليه الانس ما هيش صافية  
قلوبهم ليه ما هية دافية  
عشان العيشة مش كافية  
ما عدتش لقي ابدأ حس  
وكله يبص علي غيره  
عشان تقطع عنيه خيره  
وينسي قلبه وضميره  
عشان يقعد لغيره يرص  
وتلقي التافه الهايف  
بيعمل نفسه مش شايف



---

ومن ربه ما هوش خايف

والسقعان ييقول عارف

ويتمألس علي الغلبان

ويقعد ليه بعينه يبص

ولكن ربنا موجود

لوحده هيعدل المعووج

وتلقي الحب ف بلادنا

يعيش سلطان

وتلقي العرة والتافه

والمدمن مالوهش مكان

عشان بس البلد ترتاح

من الازمة

ونتمتع بكل امان

\*\*\*\*\*

ميعادي معاك كان امبارح

ومش صابر علي بكرة



---

وابات الليل وانا سارح  
واعيش واحلم مع الذكرى  
ودايما انت عالي بالي  
وصورتك ساكنة ف خيالي  
ويبكي الناس علي حالي  
ومستني ولو نظرة  
ميعادي معاك مالوش مواعيد  
وكان أمني للمسمة ايد  
ويوم لقياك دا اجمل عيد  
وشوقي كل مادة يزيد  
لنظرة عينك الخضرا

.....

في رعاية الله يا مشير سير  
دا طريقك مليان بالخير  
يا زعيمنا لك قلب كبير  
لطريق المجد اخترناك



---

والمولي حافظ لخطاك  
بقلوبنا وروحنا وياك  
يا واخذنا لك اغلي ضمير  
يا قاءدنا يا ابو قلب جسور  
دا طريقك مليان بالنور  
واختارك ربك لبلادنا  
علشان تتحقق امجادنا  
واختارك في الوقت الصعب  
عايزين يا زعيم في الدرب  
يا حبيبنا يا قائد يا حكيم  
في رعاية الله خطي الخطوة  
كلنا وياك خطوة بخطوة  
وقلوبنا بتهدي لك غنوة  
ف رعاية الله سيريا مشير  
بسلامتك يا مشير بسلامتك  
ندعي لك كرامتنا كرامتك



---

من طينة مصر المحروسة

تستاهل كام مليون بوسة

بنحبك والمولي معانا

وهواك راكب ويا هوانا

يحميك ربي يخليك لينا

هات ايدك حطها ف ادينا

علشانك يا مشير غنينا

.....

كلنا بنحبك يا مشير

كلنا عايزينك يا زعيم

كلنا بنحبك يا قائدنا

يا قائدنا لطريق الخير

كلنا حابينك

كلنا عايزينك

كلنا عارفينك وكمان فاهمينك

يا مناضل يا ابو قلب كبير



---

ربي يخليك ويبارك فيك

يحفظ خطاويك

ويسهل لك كل عسير

يا زعيمنا يا ابو قلب كبير

والايد ف الايد

يا ابو قلب حديد

دا قدومك عيد

وطريقك جاي للتعمير

في رعاية الله

وقلوبنا معاه

والكل وراه

وبحس الناس خطي وسير

يرضيك الرب

عدينا الصعب

ومسحنا الكرب

ودخلت القلب



---

والخير هيجي لك مهما تسير

في رعاية الله امضي يا مشير

\*\*\*\*\*

حاجات كثير تنقال وحاجات كثير تنحس

وانت شغلت البال وبحبك انت وبس

وانت حبيب الروح وانت حبيب القلب

ومهما اقول وابوح وياك عرفت الحب

وما شفت زيك حد وياك لقيت السعد

ولما اغيب عنك باعرف عذاب البعد

\*\*\*\*\*

صباح الخير

علي الايد اللي شاقيانة

علي الناس اللي عرقانة

علي العين اللي سهرانة

علي الروح اللي عطشانة

بتروي بدمها ارضك يا بلدي يا مصر



---

صباح الخير علي عيونك يا نهر النيل

يا نهر اتمد م الجنة

بيعزف اجمل المواويل

يا رمز الخير علي الوادي

يا دم بيجري ف بلادي

يا باني الخير لاجدادي

يا باقي ليكويا احفادي

لجيل ورا جيل

صباح النذل علي كل اللي باعم رخيص

وخانوا بلادهم الطاهرة بقلب خبيث

وطار الحب من روحهم

وعاشوا عبيد مع جموحهم

وكان الفرح يجرحهم

يعيش في الحيرة والحسرة كل خسيس

صباح الخير صباح النور

لرجالة اسود ونسور



---

وحالفين القسم ---وشالوا الروح علي اكتافهم

بيهدوها اليك يا مصر

وربي الكون يساندهم

ويبنوا بالأمل والحب اجمل قصر

يصبوا اللعنة عا الخاين

يهدوا قصور بناها الشر

وقالوا تعيشي يا بلادي

تعيشي يا مصر

صباح الخير علي كل اللي بيحبوا

ينول الخير اراضينا

يعم السعد واديننا

وتلقي الرحمة صايناهم

وتلقي العزة شاريهم

وتلقي الحب يجمعهم

يبارك ربنا لهم

يشوف السعد اراضهم



---

ونلقي يا رب ف اديهم شموع النصر

وتطرح فوق صحارينا علي اديهم

ثمار الفخر

صباح الخير

عليك يا مصر

=====

لونحب نبني مصر

لونحب نبني مصر لاجل تبقي بلدنا قصر

تبقي ايدنا حزمة واحدة عا الخلاف وعاء المعاندة

لاجل تبقي بلدنا وردة يبقي لنا كل فخر

لونحب نبني طيبة ننسي اي خداع وريبة

مش نسيها لايد غريبة

نمحي جوانا الظلام

اي فرقة او خصام ننهي اي شكوك وريبة

نبقي ادينا الضريبة

لونحس ببعضنا لونخاف علي امنا



---

وقلوبنا تبقي حنينة نلقي المتعاب هينة

تلقانا وسط النار اسود

ننسي الجراح ننسي الجمود

والرحمة بين الناس تسود

والخير يعمر ارضنا

لونحب نبني مصر كل يوم نزرع جديد

تلقي الشجر طارح سعيد كل يوم راح يبقي عيد

والجميع يفرح اكيد والامل في الناس يزيد

بالعمل مش بالكلام بالتسامح والوئام

بالتصافي والسلام بالعزيمة وروح وصبر

لونفكر مرة فيها نلتقانا تخاف عليها

م الخراب اوم الدمار م المعاركة والشجار

نبني جوا الليل نهار نبقي ف جراحها نواسيها

مصردي اجمل هدية خصها رب البرية

بالحماية بالعناية بالصيانة الالهية

الي ينوي شرفها ربنا يقصم له ضهره



---

واللي يبغى ليها حيرة ربنا يفضح له امره  
واللي يكشف ستر فيها ربنا يكشف له ستره  
واللي ينوي غدرفها تلقي فيها ف لحظة قبره  
عمريوم مصرما حبت غير حبيبها  
اللي ضحي عشان تعيش وعاش طبييها  
اللي من قلبه بيخلص عمره ليها  
مش يحط اديه ف جيها  
اللي عمره ستر ليها مش بيكشف للبلاد دايم عيوبها  
اللي يمسح يوم دموعها اللي بيحارب وقوعها  
اللي عاش يمسك شموعها  
مش عشان يوصل لسلطة يكون خرابها

\*\*\*\*\*

### المرأة المصرية

المرأة المصرية جواها عزيمة ووطنية

رغبتها اكيد للتضحية

وكمان وصلت للعالمية

بتحافظ علي بيتها بشدة



---

ف عملها تشوف اجمل وردة

مبادئها للغير ممتدة

ومال الروح لهما قضية

بتدافع عن حق بلدها

وحياتها ملانة بجهادها

لوطنها كمان ولاولادها

ودي هي الست المصرية

زهرة بريئة وطللة ندية

وف كل مجال تلقي تفوق

ونجوم في سمانا بتحلق

ونجاح ووراه تاني اتحقق

في ظروفها الصعبة كثير تسبق

يا جمال الست المصرية

رمز الاخلاص والفداية

يا حلاوة البنت المصرية

دي منارة الامة العربية

\*\*\*\*\*

عاشق جنونك



---

عاشق جنونك يا قمر عاشق جنونك  
وباحب لونك يا قمر وباحب لونك  
وبا خاف طنونك يا قمر وباخاطنونك  
هابدا عشانك يا قمر مشوار طويل  
ولا اخاف عذاب وقت الضنا ولا عمري اميل  
دا جمال شعورك يا قمر مالهوشمئيل  
وانا حي ليك كان العمل كان الدليل  
في الليل معاك يحلي القا يحلي الكلام  
وانعس في ساعة صحبتك ويا الغرام  
وياك راح انسي كل فرقة أو خصام  
واحب لونك يا قمر واحب لونك  
ولا عمري اخونك يا هوي ولا عمري اخونك  
العيب ما كانش في العيب كان ف الزمن  
دا زمان مليون قسية وانا نايم ف الشجن  
انا فارس للمحبة انا سلطان الوفاء  
انسان عندي مباديء انا طبعي الانتماء  
الناس باعت قيمها وماتت ف الفلوس



---

والخوف واكل بدنہا

عایشین زي التیوس

عالصديق وعاء السماحة والخير بدات تدوس

وكانهم حوالی صاروا زي الوحوش

الفقر عار وذل بين ناس ما ييرحموش

لوحسوا بيك ف حاجة لعهدك ما يصونوش

وبنتفوا ف ريشك وعنك ما يحوشوش

اما اصحاب المبادس ف الدنيا ما باساووش

والحافي لما يملك الناس فا ديه تبوس

انا غارقان ف احزاني

وميلة البخت طايلاي

وعين الحق قد شايفاني

وناس عا الصير حاسداني



---

واقول با حظي اه ياني

انا مسجون ف بيت الخوف

وكل الناس لحالي تشوف

وعن مجدي بقيت مكسوف

وعقلي م العذاب بيشت

ولسه يا ربي ايه تاني

يزود خوفي وهواني

كان السعد مش عايزينول ايدي

يدور عا الناس ويجرحني بتنكيدي

ويدبحني بضحكاته

وساعة يغيظني بسكاته

ييمشي ويا ناس ساذجة

ومش عارف اشوف ف لحظة يوم عيدي

وليه كبلتني كلي



وليه احکمت قيد غلي

## وليه عايز تشوف ذلی

## وامتي اخرج واشوف الدنيا لون تاني

**7&&&&&&&&&&&&&**

## راجع تقول ايه

## راجع تقول ايه حيرك

وعن حناني غيرك

## وانا كان فؤادي بيسحرك

بعد الى شوفته من عنيك

## بعد الصدود هابقي ناسيك

دا انا كنت عاشقك كلي ليك

لكن جنونك طيرك

## لوکان بیظہرائی ہمس



لوبان ف عينك اي لمس

لوکان ف صوتک اي حس

كان ممكن اقدر اعذرک

## باجري وراك وانت بعيد

## وسایبني ف الاشواق شريد

## وانا ا كنت ف الاخلاص وحيد

ولا اي شيء كان يئسرك

## هارجع لحبي اللي فاكرنى

## اللي بحنان الشوق يزرنني

اللي بعنيه دايماسرني

## هَابَعْدَ وَاقُولُكَ اَشْكُرُكَ

&&&&&&&&&&&&

## سكة خداع

## سكة خداع هجرو ضياع



---

غدر و جنون وعذاب حنون

وما فيش رجوع

راجع اسير خالي الضمير

مليان عبير ساكب دموع

بين الربوع تايه بعيد

ارجع اليه قبل اديه ضلل عليه ومعاه تخون

ارجع لخلق زيه وزيك

يمشي ف ضلك ومعاك يصون

ولا ليك يخون

سكة سراب ارض الخراب

انسي العتاب وما فيش جواب ولا ليك اكون

انا كنت فين من غير عنين

شفت الانين ولا فيش عيون



---

## شفت الظنون

\*\*\*\*\*

مليت انا

مليت انا منك خلاص ونسيت معاك طعم الخلاص

حبك صحيحولا حكايات ولا كان لاحلامك اساس

حيرت قلبي بالكلام وعملت لي قصة غرام

واخذتني وسط الزحام وغرقت بين نظرة وكاس

عديت معاك شطك بعيد وفضلت فيه حيران وحيد

وبقيت انا ف حبك شريد وهجرتني وسط الزحام

منك انا شفت الخداع وجريت ورا همس الضياع

وهجرتني بكلمة وداع

ودبحتني بكلمة هيام خليت عيوني كالنسيم ورمتني ليه وسط النعيم

وفتحت لي القلب الرحيم

ونسيت مع النور الظلام



---

ومليت دروب الدنيا نور وياك هويت موج البحور

وعبرت فوق كل الشعور

وقلبت ليه تاني الشراع

\*\*\*\*\*

عينك تقول

عينك تقول مغرم يا طير

دايب انا ف بحر الهجير ولا كان لحبك يوم ميرويحن ليك ولا يخدعك

برئ انا منك بريء قلب الخداع ظالم جريء دايب ف بركانك غريق

ولا كان ضميرك يمنعك

غيري عيونه تصدقك من شهد حبه يدوقك

من نظرة واحدة بيعشقك ولا من حنانه يمنعك

غيري صحيح مليان غرام وعيونه فيها الالبسام

وف قلبه هتشوف الوئام

ولا عمره مرة يخدعك



## كان غيري ممكن يسمعك

ويحس بيك ولا يخدعك

&&&&&&&&&&&&&&&

## جفف دموعك

## جفف دموعك دا الدموع دي فهمتها

## واظهر خضوعك دا العيون دي كشفتهما

منك اليك هيعود عليك

دا انا دبت فيك وليال عذابي عشتها

ووهبت ليك قلبي الي حب

كان ليك شرك ولا كان شريك اى قلب

## غررت بیه وبقیت ناسیه

ودموع عنيه ما كنت ترحم ذلها

## نشف دموعك وافتكر ايام زمان



دا انا كنت باکتم لوعتي ولا کان بیان

بس النهاردة عرفتها دي الوقتي بان لي غدرها

وعرفتها وفهمتها دي الوقتي باهرب منها

ارحم عنيك من حزنها ومن دمعها

## مش راح اسامح مہما تظہر سحرہا

## ولا عمري افكراني يوم ارجع لها

[illegible]

## وتجرحني

**وتجرحني وتدبحني وكلمة ليك تريحي**

## انادي عليك باشواقي

## عنیک بتقول وبتلاقی

وتبعد تاني ترجع لي

ولوبسمة ولوهمسة ولونظرة ولولمسة

**ولو بالروح تروح لي**



---

ساعات قلبك يكون شارد وتمشي فوق خيال بارد

وابات والدمع يدبحني

وتسمع غنوة وحكاية واقول انك بقيت اية

ونبدا تاني غنواية وترجع تاني تسمح لي

كلامي السحرف فؤادك وهمسي بلسمك زادك

وروي بصمة ف فؤادك ومهما تروح بترتاح لي

وقلبك يبجي ويبوح لي

%%%%%%%%%

وجاية تندمي

ولسه بتجرحيني وجايه تندمي

ودايما تخذعيني وبيا بتحلمي

رمشك ضلل علي عنيك تسحر عنيا



---

انا منك وانت مني

جاية تتبسمي

بتقوللي علي ايه انا ليكي ولا لها

طب ارجع ليك ليه وحياتي بتخدعها

بتغيري من جمالها وتغيري من دلالها

وحيرتي يوم خصامها وجفونها تضميني

روحي لغدرك وغيرتك

مش راح اسمع لحيرتك

وانا عايز انسي صورتك



---

وانسي لوعتي

يا ما عشت عذاب ليالي

من غدرك وانشغالي

ندمان علي شوقي ليك

وانت ولا تسالي

وراجعة تخذعيني

وناسية عذاب سنييني وعمري ما انسي جرحك

ولا عمرك ترجع لي

\*\*\*\*\*

باتصورك



---

باتصورك والحب لخبط منظرک

والحيرة جاية تكسرك والدمعة رايحة تحيرک

باتصورك

باتصورك راجع اسير راجع لايام العبير

بتحن للحب الكبير ودموع فؤادک تأسرک

باتصورك

طب ليه تسيب بحر الحنان

وليه تكون عبد الزمان

ويغيرک خاين جبان

ولسان شيطان کان يسحرک

باتصورك

باتصورك مليون جراح



---

وتهت ونسيت الي راح وتقول لي مشتاق للسماح

والحزن طعمه يصبرك

وانا قلبي هبضمك اليه ويحس بيك لما تناديه

لما تروح له هتلاقيه

ولا عمره ابدأ يخسرک

باتصورك

\*\*\*\*\*

ليه خلتنی احبك

ليه خلتنی احبك لما القسوة ف قلبك

ليه بتعانده حبك قلبك تايه فين

تقدر تنسي حبيبك احلامك ونصيبك

بكرة الشوق هيجيبك للاشواق هتلين



---

تقدر تجرح قلبك

اوتهرب من حبك بكرة الهوي هيقابلك

بعد عذاب وانين

راح ترجع لي اسير عاشق عش الطير

من نفسك هتغير ودموعك فناجين

راح ترجع للنور لما تخطي السور

لوليفك ماسور عندك شوق وحنين

عاشق للتفانين

&&&&&&&&&&

اقسم بالله

اقسم بالله انا حبيتك اقسم بالله

وبقلي واشواقي هويتك



---

منك لله

اديتك حبي واشواقي علي عهد الحب بيت باقي

بس انت بتفرح بفراقي وتحب الاله منك لله

الفت ف حبك كام غنوة وعشانك حبيت القسوة

وعذابك ايامي الحلوة

غرقني هواه منك لله

كان حبك دايب مع روحي

كان بعدك ناري وافراحي

وحنانك بلسم لجراحي واداني حياة

اقسم انك خنت حبيبك وجرحت ف يوم قلب طبيبك

وبايدك اخترت نصيبك وهجرت دواه

منك لله



&&&&&&&&&&&&&&

بتبعدني منك

بتيعدني عنك لخوفك وظنك لزيفك

وفنك وهابعد لأنك طريقك ضياع

## كلامك وصمتك وحتى ابتسامتك

## وحتي ف هيامك مجرد خداع

## باخاف من وعودك مجرد وجودك

## واخر دودك مجرد صداع

## ف همسك ولمسك ونظرة عيونك

## وحتي ف سكونك

## بيظهر جنونك يبان الصراع

تلون ف جلدك تفنن ف بعدك



---

حبيبي عرفتك حبيبي الوداع

وداعي اكيد وعهدك بعيد

ولا عمري القي في قلبك شعاع

كلامك سلامك وحتى ف خصامك

وحتى ف سلامك قرئت الضياع

.....

كرهتك خلاص

كرهتك خلاص وقلبي اشتكي من لوعته

كرهتك يا ناس ومين راح ياخذني من قسوته

كرهت ابتسامك وباكره كلامك

وحتى انسجامك انا امقته

كرهتك عشان مفيش فيه مكان ف قلبك لحب

ولا كنت ترحم دموعي وحنيني ولا بالقي قلب







---

عاتبني عاتبني كلامك عاجبني

ولما تحاسبني حبك يزيد

عاتبني وغير دا انا ليك اسير

وقلبي الكبير بيبقي سعيد

عاتبني وكرر دا شهدك مكرر

يخليني افكر وافضل شريد

عتابك حلاوته تفوق الحدود

وخوفك علي بستان ورود

وجودك معاي بيملي الوجود

وقربك وبعدك فرحة وعيد

وانا كلي ليك وعمري شاريك



---

وباسال عليك

بقلبي الوحيد

\*\*\*\*\*

يا الي انتو بتشمتوا فيا

ليه بس تقروا علي

تتمنوا دمع عنيا

تهدوا لي كل قسية

هوا انا يعني باعاديكم

دانا واحد صالح فيكم

باتمني الخير يناديكم

وبقلبي وروحي اهديكم



يعنى انا بينكم ماليش دية

## الحب الصافي هديته

## والحُضْنُ الدافِي دَعِيَّتُهُ

## وتاريخ الغدر نسيته

وبترجعوا تدعو عليا

## لئے فرحی ما یریحکوش

دا الخير عنكم ما مابعدتوش

## وف احزانی ما رحمتوش

## وتزودوا في الانانية

لِيَهْ بِسْ بَتَشْمَتُوا فِيا

&&&&&&&&&&&&&



---

انا منك انا

انا منك انا مليت

انا من كتر جرحي بكيت

ومن طول القسا حنيت وقلت يا ريتني القى البيت

وفين القى لطيفك ارض عليك لفيت وصنت العهد

وقلت ابحت ف بلد الحب لمين اشكي ومالك بيت

يا حب ارجع لدنيتنا ورفرف فوق خيال بيتنا

و زور يا حب صحبتنا يا ريت تسمع لقلبي يا ريت

انا يا حب قلبي اتهد وعاد بيني وبينك سد

وانا ما شفت زيك حد ما عدنا نلقي ليك ولا خيط

حاولت كثير وبالقي جراح لحد ما تاهت الارواح

وفارقت مهجتي الافراح لحد ما ليك ف يوم انيت



انا منك انا انيت

&&&&&&&&&&&&&&

**لَقِيْتِكَ**

**لِقَيْتِكَ طَيْفَ مَلَانِ بِالنُّورِ غَرَقْتَ فِ بَحْرِكَ الْمَسْحُورِ**

وَعِشْتَ مَعَاكَ لِيَالِي كَثِيرَ افْكَرْ فَيْكَ وَاَنَا مَبْهُورٌ

**لقيتك ماردي الجبار عرفت تاخذني للتيار**

عرفت تغرق الافكار لقيتني بالحنان مبهور

وشفتك عاشقي الخداع غرورك غدرك البياع

باقولك يا حبيبي وداع وانا علي عشقي ليك مشكور

## ليالي عشت فيها الحب وصارت ذكرياتي عذاب

قدرت تشد لهفة قلب يا فارس بالوداد كذاب



---

وانا ماشي ف بحر سراب

\*\*\*\*\*

مليت انا

مليت انا كثر الخداع وكرهت صورتك يا ضياع

ونسيت انا القلب اللي باع

قلوب بتخون عيون بتهون دموع وعيون

عيون بتحس بالالوجاع

عيون ناسية طريق الحب بتخدع ما بتعرف قلب

عيون تايه ف طول الدرب عيون عايشة ف بحر صراع

عيون بتخون ويوم تتخان وليها الغدر احلي مكان

عيون عايشة مع الحرمان ولا تلقي ف موجهها شراع



---

عيون محرومة م الاحساس عيون تنداس عيون تنباس

عيون ليها الكرامة اساس عيون بتبيع ويوم تنباع

\*\*\*\*\*

وليه تسيبني

وليه تسيبني يا قمر وتسيب خيالي

وانا قلبي م الحب انفطر بلبلت بالي

هاقعد قبالك في الفضا واحسب جمالك

واعد نجمك ف السما واطلب خيالك

دا مفيش مثالك في الوري ومفيش مثالك

واقول بحبك يا قمر يا بو نجم عالي

يا ما بت افكر في الهوي كام الف ليلة



---

واقول غرقنا يا بشر من عين كحيله

لما اشوفك بابتسم وما عندي حيله

ليه خدت قلبي يا قمر عا للي جرا لي

هافرح بكلمة او اعيش علي حسن طيفك

وها قول عشقتك يا قمر وانا نفسي اشوفك

والمس نجومك يا قمر واكسر خسوفك

طب ليه بتاخذ مهجتي كان قلبي خالي

---

والله ما تسوي حاجة

والله ما تسوي حاجة وعايضة كل حاجة

وبعت العمر كله

للتقل وللسماجة

استاذة في الرزالة

ومكانك في الذبالة



---

وتباني بريئة صافية  
علامة في الهالة  
والي يشوفك يقول  
انك بنت الاصول  
لكن اللي يعاشرك  
يقول مهما يقول  
الحب معاك لعبة  
توصلي بيها لغرض  
وقلبك كله قسوة بعد ما يظهر اسد  
للحب مفيش مكان  
ولا كان عندك نظر  
لكن حبك لنفسك  
كره فيك البشر  
وفاكرة انك احلي  
وانت جنب القمر  
خليك جوا نفسك  
وعيشي في الخطر



\*\*\*\*\*

يا حبيبي ليه النرفة  
يا حبيبي ليه النرفة  
وانت اللي خدت الاستاذة  
لفيت علي بيوت الغرام  
ومعاك لقيت المعجزة  
طب لي تغير  
وانت الامير  
بحتتبي ولا اذا  
خلي الغزول يا جميل يزول  
مهما يقول  
ونلاوح له ناخذ له العزا  
يا حبيبي ليه مني الحذر  
وانت حبيبي المنتظر  
وانت اللي احلي من القمر  
ولا كان عذر ولا كل جذر  
فضيت يا روي المحفظة

\*\*\*\*\*

وتستعمي حبيبك ليه  
هتيجي ف يوم وتبكي عليه  
مش انت بقلبك اخترته



---

ف لحظة طعنته وهجرته  
بغدرك هنت وخسرتة  
قدرت تجيبه وتجره  
برمشك كنت بتغره  
قدرت تحبه وتشده  
قدرت تهينه وتهده  
وقفت كثير علي بابه  
عشقت عتابه وعذابه  
خدعته وعشت ف سرايه  
بقيت تحكي له وتقول له  
وكنت خياله مع ظله  
ف لحظة جه معاك ذله  
وعمرك يوم ما راح تلاقيه  
حبيبك ابكي يا اللا عليه

\*\*\*\*\*

وليه القسوة يا معلم  
دا انا قلبي معاك سلم  
بلاش تدبح بلاش تجرح  
دا بالحب باتالم  
وليه تنساني يا غالي  
تخط الانف ف العالي  
ولا ترحم ف يوم حالي



هتيجي ف يوم وتتندم  
خسرت ف يوم حبيب طيب  
رميته وخنت ايامه  
نسيته وبعث احلامه  
وتيجي ف مرة تستقوي  
هتبقى خسيس ولا تسوي  
وتلعب بيه وتتحكم  
عيونك ليه بتتكلم  
بلاش الغدر يا معلم

واستحمرني يا حبيبي  
يا صاحب قلبي مع جيبى  
دا حبك بختي ونصيبي  
وفرحني بتعذبي  
بتسحرني برمش عنيك  
ودايما قلبي مشتاق ليك  
باحبك عمري احن اليك  
وانت حبيبي وطيبى  
وبردعني ودلعي  
ما غير بعدك بيوجعني  
وفلفلني ولوعني  
دا كله فداك وايه يعنى



عشان يا حياتي ترضي بي  
واستحمرني وواكويني  
دانت حبيبي نور عيني  
واهجرني وووريني  
ما هو انت حبيبي وقريبي  
واستحمرني يوم ف هواك  
دا انا يا حياتي كلي فداك  
وكلي يا روي لاجل رضاك  
اسيب الدنيا وابقي معاك  
وبعدي كان معاك عيبي  
ما هوانت حبيبي وطبيبي

////////////////////////////////////

يحبك وانت فاقعاني  
يا ماسكة قلبي ولساني  
يا غاسلاني يا ناشراني  
يا كاوياني يا طاوياني  
يا اجمل ضربة في اسناني  
يا روي يا حنة من قلبي  
عشقتك يا سبب غلبي  
عليا ا الغلب بتصبي  
يا روي يا كل احزاني  
حبيبك ليك كالفقة



---

صغير لسه ف اللفة  
وسابك روحه والدفة  
دا احبك ياما ورائي  
بحبك وانت عاصرائي  
يا لاوياني يا غلياني  
يا خايلاني يا عامياني  
وجوا القلب دافناني  
معاك الدنيا شيء تاني  
بحبك وانت حبابي  
''''''''''''''''''''

#### تسلم ادين

تسلم ادين الفلاحين الي ف غيطنهم يعزقوا  
تسلم ادين النجارين اللي ف ورشهم دققوا  
تسلم ادين البنايين اللي بميزانهم دققوا  
تسلم ادين النقاشين اللي بعرقهم زوقوا  
والايد الشقيانة بالاتقان مليانة  
بتادي اعمالها بسماحة وامانة  
عمالنا ابطالنا وقلوبهم عمرانة  
ف قلوبنا بتلقاهم واخدين اعلي مكانة  
تسلم جنودنا السهرانيين اللي بحياتهم يفتدوا  
يا خدوا بادين المحتاجين ولا يوم عليهم يعتدوا  
واسود فراعنة جبارين لرقاب عدانا يحصدوا







---

شمتوا ف جرحك يا وطن وباعوك كثير  
ولا رحمة باقية ف قلبهم ولا فيش ضمير  
ياكلوا في خيرك ويبيعوك للي يخون  
وكل حبة من ترابك ليه تهون  
شيع صديقك يا بطل قبل اديه  
وافرح بانه نال شهادة والجنة ليه  
اما اللي خالك يا وطن حسرة عليه  
هيعيش ذليل اعمى ف قلبه وف عنيه  
ويموت خسيس تافه تعيس خاين سفيه

---

اهرب معاك ولا اليك  
اهرب معاك ولا اليك  
دا انا عمري قلبي كلي ليك  
وابيع حياتي واشترىك  
وازاى راح اهرب من عنيك  
مهما السنين تزرع انين  
مهما تدور بينا السنين  
انا عمري مخلص ليك امين  
انا ليك ودائب عمري فيك  
منك بديت وانا عشت بيك



\*\*\*\*\*

اللي خاتك واللي باعك  
اللي خاتك واللي باعك  
قصدهم يلوا دراعك  
كلهم كارهين شراعك  
كلهم عايزين ضياك  
اصبحوا في الشر صحبة  
اللي خانوا والي هدوا  
واللي راح ياخدوا ما يدوا  
كلهم ف الغدر جدوا  
لاجل جرحك جم وهبوا  
وقت فرحك يستخبوا كلهم قاصدين خداعك  
علمي الدنيا الحضارة  
واركبي قطر المهارة  
دانت للدنيا منارة خلي جندك ليه يردوا  
يا بلادي يا ابيه يا كريمة يا قوية  
يا مهاد العبقرية يا صبية ويا فتية  
كلنا اسفين لأنا مش هنقدر نوفي دينا  
مهما نعطي مهما كنا  
كلنا فداك يا مصر  
انت ف قلوبنا ودمانا وف خيالنا وف هوانا



---

وف منامنا وف منانا  
وف فرحنا وف عزانا  
انت ف قلوبنا يا مصر  
كلنا فداكي يا مصر

\*\*\*\*\*

لو كان وياك فلوس  
لو كان وياك فلوس  
الناس راح تعشقك  
والناس ف اديك تبوس  
والكل يصدقك  
اما اللي ما معاهوش هيقولوا ما يلزموش  
وكماني ما نعرفوش  
والكل هيدلقك  
هيقولوا امشي لأه ويزقوا الف زقة  
وساعتها ما تبقي فارقة لو واحد يخنقك  
هيبيعوا ويشتروا فيك  
ولا واحد هيراضيك  
ولا يبكي ف يوم عليك  
لو واحد يشنقك

\*\*\*\*\*



---

يا حبيبي يا قفا  
يا حبيبي يا قفا  
ليه ضيعت الصفا  
م الحيرة وم الملاوعة  
ومن عدم الوفا  
يا حبيبي يا قفا  
كان ليه طول العذاب  
كان فين حب انتفي  
وكمان طول العتاب  
بالحب وبالدفاء نفتح اجمل كتاب  
انا من كثر الاسف  
منك قلبي انكسف  
وكمان زاد الاشف  
وفي وشي قفلت باب  
يا حبيبي يا حويط  
راسي اتخبطت ف حيظ  
وانت عامل عبيط  
وحياتي بقت هباب  
يا حبيبي يا عسل  
منك قلبي اتقف  
خدعتني عيون جريئة



---

عاملة هادية وبريئة  
وحبيبي اكبر كداب  
يا حبيبي يا عديم ا  
لذوق والمفهومية  
انا قلبي معاك كريم  
وانت ما عندك حنية  
تطعني في الصميم  
وتعيط تاني عليه  
خليك يا حبيبي حكيم  
تكسب قلبي وعنيا

---

مكاراة ومسهوة  
وغامضة وملعبة  
وف اختلاق النكد  
الطبخة متسبكة  
تموتي ف السيطرة  
وماشية عا المسطرة  
وعاشقة للمنظرة  
وشاطرة ف الللكة  
يقولوا فيك العبر  
يقولوا ايه يا تري  
ميالة للفشخرة



---

علي نفسها بتفتري  
حنانة للدريكة  
يا ام العيون الورق  
انا قلبي ضاق واتخفق  
وركبت موج القلق  
والمعدة متلبكة  
تسوقي ف المسكنة  
تباني كالملبنة  
ولو تنولي الغرض  
تباتي متطمنة  
دايما تدوري تلقي  
ومن الخداع ما تكفي  
وخبطت ايدي ف كفي  
والقلب مني اتسرق  
مكاراة وملعبطة  
وعبيطة مستعبطة  
وف كتفي متشعبطة  
وغويطة متلونة  
خطيت عشائك قنا  
ونسيت طريق الهنا  
وانا تهت وسط السبق  
وحبيبي نال المنا



---

## وادي متشبكة وادي متشبكة

---

يا قناتنا يا حرة يا قناتنا  
ضحينا عشانك بحياتنا  
ومعك انكتبنا رواياتنا  
يا قناتنا يا حرة يا قناتنا  
بعرقنا الغالي حفرناك  
وبدم الشهدا عبرناك  
والوقت بنحلم وياك  
من نبض عقولنا ومجهودنا  
ومع اصحابنا واخواتنا  
يا قناتنا يا حرة يا قناتنا  
عا الضفة الشرقية جنودنا  
عا الضفة الغربية اولادنا  
رجالة بتبني ف امجادنا  
ومعك اترسمت اعيادنا  
يا قناتنا يا مدنة ف بلدنا  
يا قناتنا يا حرة يا قناتنا  
ومعك راح ناخذ صورة  
لقناتنا الحرة المعمورة  
لسفينة بتعبر بحضارة



---

بحضارة مصر المنصورة

وايد المولي علي ايدنا

سمينا يا قناة وعدينا

والمولي يبارك خطاويننا

وصحينا عشانك ضحينا

شغلنا عقولنا وجددنا

يا قناتنا يا رمز لعزتنا

يا قناتنا يا حرة يا قناتنا

&&&

حبيبي عايز يخلعني

انا وحبيبي في الغرام اسعد حبيبين

دا فقع لي م الحب مرارتي وفقع لي العين

كان يوم سعيد يوم ما دخلنا عش المجانين

لا انا عدت باعرف انا ماشي ولا رايح فين

ولا حتي عارف ايه اسمي ولا جاي منين

انا وحبيبي مفيش مننا في الدنيا اتنين

\*\*\*

وحبيبي بالحب ساحرني

وبنظرة العين يسرني

ولا عمره يوم بيعبرني

علي حبه ايه الي جبرني

دا انا كنت حزين



---

دا حبيبي عمره مضيعني  
وعمره بالشوق يخدعني  
وبالمحبة يلوعني  
باقل شيء كان بيعني  
اخرتها عايز يخلعني  
عشرتنا سنين  
مساء الخير يا شعب  
مساء الخير يا شعب  
يا قاهر كل صعب  
يا زارع كل مجد  
يا واهب كل حب  
مساء الخير يا طيب  
يا اغلي واحلي قلب  
مساء الخير عليك  
في الأرض وف الغيطان  
مساء النور عليك في  
الحرب وف الميدان  
مساء الخير يا طيب  
في الجامع والاذان  
يا حامي للعروبة  
يا صاين للإيمان  
يا زارع كل بسمه



---

يا صانع للأمان  
يا شعب عمره ما خاف  
الا من الرحمان  
مساء الخير عليك  
يا نار علي العدوان  
يا دافن كل باغي  
يا ناسف للطغيان  
يا وش ملان سماحة  
لكن جواك بركان  
يا محطم كل حاقد  
وماسح كل جبان  
مساء الخير يا شعب  
يا اغلي واحلي قلب  
يا واهب كل خير  
يا صانع كل حب

## الفهرس

- 1- اهداء
- 2- رغم كل اللي يقابلني
- 3- يا سعادة الباشا
- 4- ما عادشي يفيد ولا ينفع



---

5- علي عيني وعلي راسي

6- تسع تيام بلياليهم

7- انا الاديب الادباتي

8- تصبح علي خير

9- باحبك يا اللي مالكاني

10- وبحبها

11- ما دام الحب جمعني انا وياه

12- مفيش ولا لحظة ولا ثانية

13- بحبك وانت علي بالي

14- لفين هتروحي يا بلادنا

15- ميعادي معاك كان امبارح

16- في رعاية الله يا مشير

17- كلنا بحبك يا مشير

18- حاجات كثير تنقال

19- صباح الخير

20- لو نحب نبني مصر

21- المرأة المصرية

22- عاشق جنونك

23- العيب ما كانش فيا

24- انا غرقان ف احزاني

25- راجع تقول ايه

26- سكة خداع



- 
- 
- 27- مليت انا
  - 28- عينك تقول
  - 29- جفف دموعك
  - 30- وتجرحني
  - 31- وجاية تندمي
  - 32- با تصورك
  - 33- ليه خلتنى احبك
  - 34- اقسم بالله
  - 35- بتبعني منك
  - 36- كرهتك خلاص
  - 37- عاتبني
  - 38- يا اللي انتو بتشمتو فيا
  - 39- انا منك انا
  - 40- لقيتك
  - 41- مليت انا
  - 42- وليه تسيبني يا قمر
  - 43- والله ما تسوي حاجة
  - 44- يا حبيبي ليه النرفزة
  - 45- وتستعمي حبيبك ليه
  - 46- وليه القسوة يا معلم
  - 47- واستحمرني يا حبيبي
  - 48- بحبك وانت فاقعاني



- 
- 49- تسلم ادين الفلاحين  
50- امسح دموعك يا بطل  
51- اهرب معاك ولا اليك  
52- اللي خائنك واللي باعك  
53- لو كان وياك فلوس  
54- يا حبيبي يا قفا  
55- مكارة ومسهوكة  
56- يا قناتنا يا حرة يا قناتنا  
57- حبيبي عايز يخلعني  
58- مساء الخير يا شعب